





Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
5913/A







Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
5913/A





Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
5913/A



Early European Books, Copyright © 2012 ProQuest LLC.  
Images reproduced by courtesy of The Wellcome Trust, London.  
5913/A



PH

P

TRACT

è natur

DIVI

Alia

T



DE LAPIDE

71009

PHILOSOPHORVM,

TRACTATVS DVODECIM,  
è naturæ fonte, & Manuali experientia deprompti.

*Author sum, qui*

DIVI LESCHI GENVS AMO.

*Michael Sendivogius est auctor*



*Michael  
Sendivogius*

FRANCOFVRTI,

Typis Ioannis Bringeri, Sumptibus  
Anthoni Humml.

---

M. DC. XI.









Præfatio ad Lectorem.

OMNIBVS, CHY-  
MICÆ ARTIS INQVI-  
SITORIBVS, GENVINIS VI-  
delicet Hermetis filiis, Autor salu-  
rem, & benedictionem à Deo  
precatur.



*V* M *mecum perpenderem, candi-  
de Lector, multos adulterinos libros,  
falsaque, ut vocant, Archymistarum  
recepta, impostorum fraude & aua-  
ritia composita, in quib. ne scintilla quidem ve-  
ritatis elucet, inter naturalium, occultarumque  
Artium Indagatores versari, quibus & quam  
plurimi decepti sunt, & adhuc decipiuntur, ni-  
hil me utilius facturum existimaui, quam si Ta-  
lentum à patre Luminum mihi concreditum,  
cum filiis & heredibus scientia commune habe-  
rem, ut & posterius animadverterent, non solū pri-  
oribus seculis, verum etiam hoc nostro, singula-*

A 2

rem



rem illam DEI benedictionem Philosophicam,  
 quibusdam hominib. non fuisse denegatam. No-  
 men meum, certis de causis publicare, non consul-  
 tum visum est, dum non mihi laudem quero sed  
 Philosophiæ amatoribus prodesse studeo: Ideo  
 vanam gloriæ cupiditatem relinquo illis, qui  
 malant videri quam esse. Quæ hîc in veritatis  
 philosophicæ indubitata attestatiōe scribo, pau-  
 cis comprehensa, à Manuali experientia mihi ab  
 Altissimo concessa, deprompta sunt, ut ij, qui in  
 hac laudatissima scientia, prima & realia posue-  
 runt fundamenta, hac cohortatione pulcherri-  
 marum rerum exercitationem non deserant, &  
 sic à scelerata Fumi vendulorum turba, cui dulce  
 est decipere, tuti sint. Non sunt somnia, ut igna-  
 rum vulgus loquitur, nec inania otiosorum  
 hominum commenta, ut stulti & insipientes,  
 qui artem rident. Veritas est ipsissima Philoso-  
 phica, quam ut veritatis amator, in veritatis  
 Chymicæ immerito proclamata subsidium &  
 confirmationem, occultare, aut silentio inuolue-  
 re, non debui nec potui: quamvis hisce malignis  
 temporibus (ubi virtus & vitium aequiparan-  
 tur) propter seculi indignitatem, hominumque  
 ingratitude & infidelitatem (ne quid de  
 Philo-



*Philosophorum maledictionibus loquar) in publicum prodire maximopere pertimescat. Possem adducere Chymica huius veritatis testes, auctores videlicet grauissimos, iuxta unanimum veneranda Antiquitatis in tot diuersis nationibus consensum: At, quæ experimento oculari videntur, probatione non indigent. Viderunt illam sine veste Dianam, Hisce elapsis annis (sciens loquor) multi & suprema & infima sortis homines: Et licet reperiantur quidam maleferiati, qui aut ex inuidia, aut malitia, aut metu detectionis imposturarum suarum, clamitent auro suam animam posse extrahi, & pomposa ac vana ostentationis delusione alieno reddi corpori, non sine temporis, laborum, ac sumptuum iactura & detrimento: sciant procerto Hermetis filii eiusmodi animarum, vt loquuntur, siue ab auro siue à Luna (quacunque viam vulgari Alchymistica) extractionem, meram esse persuasionem, quod quidem à multis non creditur, sed tandem per experientiam unicam & solam veritatis Magistram, cum damno verificatur. Econtra qui (viâ Philosophicâ) hoc sine fraude & fucopræstare possit, vt vel minimum Metallum, siue cum lucro, siue sine lucro realiter colore*



*Solis vel Luna (in omnibus Examinibus requisitis permanente) tingat: Illum iure affirmare possum, habere fores naturæ apertas ad ulterio-  
ra, & altiora arcana inuestiganda & cum Dei benedictione acquirenda. Porro præsentēs hos Tractatus, mea experientia conscriptos, scientiæ filiis offero, ut dum omni cogitatione, motuque animi in naturæ occultis operationibus inquirendis, versentur inde rerum veritatem, ipsamque naturam perspiciant, & cognoscant: In qua Re sola totius sanctissimæ artis philosophicæ perfectio consistit, modo via Regia, quam natura in omnibus operationibus præscribit, progrediantur. Ideo hic Candidum Lectorem admonitum velim, ut scripta mea, non tam ex verborum cortice, quam è naturæ viribus intelligat, ne postea tempus, Laborem, & sumptum frustra expensum deploret: Consideret Sophorum hanc esse scientiam, non imperitorum: Et longe alium esse Philosophorum sensum, quam ut eum percipiant, vel Thrasones gloriosi, vel Literati irrisores, aut contra conscientiam vitiosi (qui dum virtutibus emergere non possunt, sceleribus & honestorum virorum calumniis id moliuntur.) vel imperiti circumforanei, qui suis dealbatio-  
nibus*



nibus & Rubefactionibus, cum indignissima  
 laudatissima scientiæ Chymica diffamatione,  
 uniuersum fere mundum deceperunt. Huius fa-  
 rina Homines, sanctissima illa scientia nun-  
 quam in penetralia sua intromittet. DEI enim  
 donum est. Siquidem ad eam, non nisi sola DEI  
 intellectum illuminantis gratia, per patientem  
 & Religiosam humilitatem perueniri possit, aut  
 per ocularem experti Præceptoris demonstratio-  
 nem: quapropter à DEO alienos merito à secretis  
 suis procul abigit. Quod reliquum est, filios artis  
 unice rogo, ut meum bene de ipsis merendi stu-  
 dium, animo grato accipiant, & cum OCCUL-  
 TVM fecerint MANIFESTVM, atque Dei nu-  
 tu, constanti labore in optatum portum philoso-  
 phicum appulerint, philosophico more omnes in-  
 dignos ab hac arte excludant amorisq; erga pro-  
 ximum egenum in timore DEI, postposita va-  
 na ostentatione, memores, Optimo ter Maximo  
 pro speciali hoc munere, sine abusu, intacito &  
 pie gaudenti sinu, sempiternas gratitudinis lau-  
 des decantent.

Simplicitas veritatis sigillum.

A 4

EPI.





EPIGRAMMA.

In

VERE AVREOS DE  
LAPIDE PHILOSOPHORVM  
tractatus Anonymi Leschi.

**S**unt multi, lapidis nostri quæis fabrica sordet;  
Hi sordent merito, maxime Lesche, tibi.  
Maxime Lesche placet tibi triga: Deus, natura, Ars.  
Triga tibi hæc placeat, maxime Lesche, diu.  
Perge mari vxorem coniungere, soluere iunctos  
Perge. Deus foueat cœpta secunda diu!  
Perge malos chymicos conuellere, perge docere:  
Vt ne dilapident omnia pro lapide.

Iohan-Henricus Alstedius, Pro-  
fessor Philosophus f. Fran-  
cofurti, ad Mœnum, anno  
1611. feris Paschalibus.

DE





Duodecim Tractatus.

# DE LAPIDE PHI- LOSOPHORVM.

*Authore me, qui*

<sup>2</sup> <sup>7</sup> <sup>6</sup> <sup>3</sup> <sup>4</sup> <sup>5</sup> <sup>1</sup>  
DIVI LESCHI GENVS AMO,  
<sup>11. 13. 12.</sup> <sup>16</sup> <sup>15. 9. 10. 17. 18.</sup> <sup>14</sup>

## TRACTATVS I.

*De natura, quidnam ea sit, & quales eius  
debeant esse Scrutatores.*



ULTI sapientes, doctissimique  
viri, ante complura secula, imo  
Hermete teste, ante diluuium,  
multa scripserunt de conficiendo  
lapide Philosophorum, & tot nobis  
reliquerunt scripta, vt nisi natura in dies operare-  
tur credibilia nobis, vix iam aliquis verum existi-  
maret esse NATVRAM, quia superioribus seculis  
non tot inuectores rerum fuerunt: Nec etiam an-  
tecessores nostri, aliud quicquam considerarunt  
præter naturam ipsam, & naturæ possibilitatem:

A s

Et



Et quamuis illi in simplici tantum naturæ via  
 manserit, ea tamen inuenerunt, quæ nos nunc in  
 tot rebus versantes, vix nostris ingeniis potuisse-  
 mus imaginari: hoc fit, quia nobis natura, &  
 generatio rerum in orbe iam vilis simplexque  
 videtur: Et ideo ingenia nostra, non ad res  
 cognitæ, sed ad talia, quæ non, vel vix fieri  
 possunt intendimus: quapropter ita etiam nobis  
 succedit, facilius excogitare res subtiles, & quas  
 ipsi Philosophi nescirent, imaginari possumus,  
 quam ad verum naturæ cursum, & Philoso-  
 phorum sensum peruenire: Et sic natura ho-  
 minum comparata est, vt ea quæ scit, negli-  
 gat, alia semper quærat, multo magis ingenia  
 humana, quibus natura subdita est: Exempli  
 gratia, vides quemlibet Artificem, cum iam  
 ad summam artificii sui perfectionem peruene-  
 rit, alia quærit, aut eo abutitur, aut planè de-  
 finit: Ita etiam generosa natura, semper agit,  
 vsque in ipsum Iliadum, hoc est, Terminum  
 vltimum, postea cessat: Nam indita est natu-  
 ræ promissio quædam ab initio, vt percursum  
 integrum possit ad meliora venire, & requiem  
 habere plenariam, ad quam omni conatu,  
 tendit, & gaudet suo fine, non aliter, vt For-  
 mica senio, cui in senectute natura creat alas:  
 ita nimirum & nostra ingenia, eousque pro-  
 gressa sunt, præsertim in Arte Philosophica,  
 seu Lapidis praxi, vt iam fere in ipsum Iliadum  
 per-



peruenerimus. Nam ars Chymicæ eiusmodi subtilitates nunc inuenit vt vix maiores possint reperiri & eatenus differt à veterum Philosophorum Arte, prout Faber Horologiorum, à simplici Fabro ferrario: Et licet ambo tractent ferrum, nilominus neuter sciret alterius labores, quamuis ambo sint in sua arte Magistri. Si hodie reuiuisceret ipse Philosophorum Pater Hermes, & subtilis ingenii Geber; cum profundissimo RAYMUNDO LULLIO, non pro Philosophis sed potius pro Discipulis à nostris Chymistis haberentur: Nescirent tot hodie vsitatas distillationes, tot circulationes, tot Calcinationes, & tot alia innumerabilia Artistarum opera, quæ ex illorum scriptis huius seculi homines inuenerunt & excogitarunt. Vnicum tantum nobis deest, vt id sciamus, quod ipsi fecerunt, Lapidem videlicet Philosophorum seu Tincturam Physicam: Nos dum illam quærimus, alia inuenimus, & nisi ita vsitata esset procreatio humana, & natura in eo suum ius teneret, iam vix non deuiaremus. Sed vt reuertar ad propositum: Promisi in hoc primo Tractatu naturam explicare, ne nos à simplici via vera, vana deflectat imaginatio. NATVRAM igitur dico, vnā, verā, simplicem, integram in suo esse, quam Deus ante secula fecit, & spiritum ei inclusit: Scito autem naturæ terminum esse Deū, qui & naturæ principium est, siquidem nullū finitur initiū nisi in eo, in quo incipit.

Di-



Dixi vnicam esse tantum, per quam Deus omnia facit, non quod Deus sine illa operari nesciret, (siquidem ipse naturam fecit, & omnipotens est) sed ita sibi placuit, & fecit: Res omnes ex illa natura vnica proueniunt, nec est in orbe aliquid extra naturam: Et quamuis aliquādo abortus fiant, hoc non est naturæ, sed vel Artificis vel loci vitium. Natura hæc diuisa est in loca quatuor, in quibus hæc omnia operatur, quæ apparent, & in vmbra sunt, siquidem res potius in vmbra sunt, quam vt vere appareant: Mutatur in mare & fœmina, & Mercurio assimilatur, quia se iūgit variis locis, & secundum terræ loca bona vel mala res producit, licet non sint loca mala in terra, pro vt nobis videtur: Qualitates autem sunt tantum quatuor, & hæc omnibus insunt rebus, neq; concordant, semper vna excedit aliam: Natura autem non est visibilis, licet visibiliter agat, nam est spiritus volatilis, qui in corporibus suum agit officium, locum & sedem suam habet in voluntate diuina, nobis hoc loco ad nil aliud ipsa prodest, nisi vt eius loca sciamus, quæ sint ipsi conuenientiora vel propinquiora, hoc est, vt sciamus, coniungere rem rei, secundum naturam, ne misceatur lignum homini, aut Bos vel Animal Metallo, sed quodlibet agat in suum simile, & tunc etiam natura suum præstabit officium. Locus naturæ non est alius, quam vt supra dictum, in velle D E I. Scrutatores naturæ, tales esse debent,



bent, qualis est ipsa natura, veraces, simplices, patientes, constantes, &c. & quod maximum, pii, Deum timentes, proximo non nocentes: Postea diligenter considerent, num propositum suum cum natura concordet, an sit possibile, ab exemplis discant apparentibus, ex quibus videlicet rebus quid fiat, quomodo, & in quali vase natura operetur: Nam si tu simpliciter vis aliquid facere, sicuti ipsa facit natura, sequere naturam: Sin vero præstantius quid moliris, quam Natura, id animaduerte in quo & per quid melioratur, & semper in suo id fiet simili: Exempli gratia, si cupis metallum (quæ est nostra intentio) ulterius quam natura fecit, in virtute promouere, naturam accipere oportet Metallicam, & hoc in mare & fœmina, alias nil efficies. Si enim intendis ex herbis creare Metallum, laborabis inuanum, sicuti etiam ex Cane vel Bestia lignum produces.

---

## TRACTATUS II.

### *De operatione naturæ in nostro proposito & Spermate.*

**N**aturam iam dixi esse veram, vnicam, ubique apparentem, continuam, quæ cognoscitur ex rebus productis, lignis videlicet, herbis, &c. Dixi etiam Scrutatorem naturæ esse oportere

re



re veracem, simplicem, patientem, constantem vanicæ saltem rei animum applicantem, &c. Nunc de naturæ actu incipiendum: Sicuti natura in Dei velle est, & Deus creavit illam, vel imposuit omni imaginationi, ita natura fecit sibi semen, hoc est, velle suum in Elementis: Illa est quidem una, & tamen res profert diuersas, sed nil operatur sine Spermate, quicquid Sperma vult operatur natura, nam est instar Artificis alicuius instrumentum. Sperma igitur vniuscuiusque rei melius & vtilius est Artifici, quam natura ipsa: Nam è natura sine Spermate efficies tantum, quantum sine igne, auro vel argento Aurifaber, aut sine grano & semine Agricola. Habito Spermate, natura præsto aderit, siue ad malum, siue ad bonum. Operatur illa in Spermate, vt Deus in libero hominis arbitrio, & hoc est magnum Miraculum, quod natura obedit Spermati, non coacta sed propria sponte, sicuti & Deus omnia concedit, quæ Homo vult, non coactus sed ex proprio velle: Ideo Homini liberum dedit arbitrium, siue ad malum siue ad bonum. Sperma igitur est Elixir cuiusque rei, vel quinta essentia, seu perfectissima rei decoctio, & digestio, vel Sulphuris Balsamum, quod idem est, quod Humidum Radicale in Metallis: Magnus quidem hic de hoc Spermate posset institui sermo, sed nos tantum ad propositum in arte Chymica tendimus: Quatuor Elementa generant



rant Sperma, voluntate Dei & imaginatione naturæ: Quemadmodum enim viri Sperma habet centrum, seu vas sui seminis in renibus, ita quatuor Elementa motu indefinente (quodlibet secundum suam qualitatem) proiciunt Sperma in terræ centrum vbi digeritur & per motum emittitur foras: centrum vero terræ, est quidam locus vacuus, vbi nil quiescere potest: In centrum (vt ita loquar) seu centri marginem & circumferentiam, quatuor Elementa suas proiciunt qualitates, sicuti vir suum emittit semen in vterum mulieris, in quo nil manet de Semine, sed postquam debitam Matrix accipit portionem, cæterum eiicit foras: Similiter in centro terræ accidit, vt vis Magnetica partis alicuius loci rem ad se attrahat, conuenientem sibi ad pariendum aliquid, cæterum eiicitur foras in lapides & alia excrementa: Nam omnes res ex eo fonte habent originem nec quicquam in toto mundo nascitur, nisi per hunc fontem. Exempli gratia, Habeatur in aliqua mensa plana vasculum Aquæ, quod locetur in Mensæ medium, & circumcirca ponantur res variæ, & colores varii, item Sal, &c. quodq; separatim: effundatur postea Aqua in medium, videbis illam Aquam hinc inde diffluere, & dum riuulus vnus attinget colorem rubeum, rubefiet ab illo, si ad salem, salis saporem mutuabitur, & sic de cæteris. Aqua enim loca non mutat, sed locorum diuersitas mutat Aquam. Simili modo è cætro terræ

Semen



Semen vel Sperma à quatuor Elementis in centrum proiectum ad varia loca transit, & secundum loci naturam naturatur res, si peruenit ad locum terræ & Aquæ purum, fit res pura. Semen & Sperma omnium rerum est vnicum, & tamen varias res generat, vti è sequenti apparet exemplo: Viri Semen, est semen nobile, & saltem ad generationem hominis est creatura<sup>m</sup>: nilominus, si vir abutatur eo, quod est in eius libero arbitrio, nascitur abortus: Nam, si contra grauissimas Dei inhibitiones vir iniret vaccam, aut aliam bestiam, facile conciperet bestia viri semen, quia natura non est nisi vna, & tunc non nasceretur Homo, sed bestia & abortus, siquidem locum non inuenit semen sibi competentem: Tali in humana & detestanda commixtione viro- rum cum bestiis variæ bestię producerentur hominibus similes. Ita enim fit, si Sperma intrat centrum, nascitur, quod inde nasci debebat, sed cum iam in locum venit, & concipit, non amplius mutat formam: Verum dum adhuc in centro Sperma est, æque facile ex illo spermate produci potest arbor, quam Metallum, tam cito herba quam lapis, & vnus pretiosior altero, secundum puritatem vel impuritatem loci: Sed quomodo Elementa Sperma generent, nunc nobis dicendum est, & hoc modo fit: Elementa sunt quatuor duo sunt graua, & duo sunt leuia, duo sicca, duo humida: sed vnum maxime siccum, & alterum maxime



xime humidum, sunt masculina & foeminina, &c. Horum quodlibet per se est promptissimum ad producendum res sibi similes in Sphæra sua, & ita voluit Altissimus: Hæc quatuor non quiescunt, sed semper inuicem agunt, & quodlibet per se emittit suum subtile, ac in centro conueniunt. In centro vero est Archæus, naturæ seruus, qui ea Spermata miscendo eiicit foras. Quomodo autem id fiat, in Epilogo horum duodecim Tractatum copiosius videre est.

### TRACTATVS III.

#### *De vera prima Metallorum materia.*

**P**rima Metallorum materia duplex est, sed vna sine altera Metallum non creat: Prima & principalis est humidum aëris caliditate mixtum, hanc Philosophi Mercurium nominarunt, qui radiis Solis & Lunæ gubernatur in mari Philosophico: Secunda est terræ caliditas sicca, quam vocarunt Sulphur: Sed quia omnes veri Philosophi hanc maxime occultauerunt, nos paulo lucidius illam explicabimus, pondus præsertim, quo ignorato, omnia destruuntur: Inde fit vt multi ex re bona producant abortus: sunt enim qui totum corpus pro materia seu semine vel Spermate sumunt, alii frustum, & hi omnes à recto declinant tramite. Exempli gratia, si quis viri pedem, & mulieris

B

lieris



mag 20.

tract de



lieris acciperet manum & vellet ex hac commi-  
 stione creare hominem, non esset possibile. Est  
 enim in quolibet corpore centrū, & locus vel se-  
 minis seu Spermatidis punctum, & semper 8200.  
 pars etiam in ipso grano Tritici: Et hoc aliter  
 esse non potest: Nam non totum granum vel  
 corpus vertitur in semen, sed tantum est in cor-  
 pore scintilla aliqua necessaria, quæ à suo corpore  
 custoditur, ab omni excessiuo calore & frigore,  
 &c. Si habes aures & sensus, hic animaduerte  
 & securus eris, non tantum ab illis qui locum  
 Spermatidis ignorant, totumque granum in semen  
 reducere nituntur, verum etiam ab his omnibus,  
 qui in solutione Metallorum versantur vana, &  
 Metalla per totum soluere volunt, vt postea ex il-  
 lorum commixtione mutua, nouum creent Me-  
 tallum. At hi si naturæ processum considerarent,  
 viderent rem se habere longe aliter. Nam nul-  
 lum Metallum est tam purum, quod non ha-  
 beat & suas impuritates, vnum tamen altero  
 pauciores vel plures: sed tu amice lector, pri-  
 mum obseruabis naturæ punctum, vt supra di-  
 ctum & satis habes: sed hanc tibi habeto caute-  
 lam, ne in Metallis vulgi illud quæras punctum,  
 in quibus non est: Nam hæc Metalla, præsertim  
 aurum vulgi mortua sunt, sed nostra sunt viua,  
 spiritum habentia, quæ omnino sumenda sunt:  
 Scito enim Metallorum vitam esse ignem, dum  
 adhuc in suis mineris sunt, & mortem etiam ignē,  
 fusio-



fusionis videlicet. Prima vero Metallorum materia est humiditas quædam mixta aere calido, & est in forma aquæ pinguis adhærentis unicuique rei puræ vel impuræ, in vno loco tamē abundantius quam in altero, quod fit quia terra est in vno loco magis aperta & porosa, vim attractiuam habens quam in altero: Prouenit aliquando per se in lucem, induta veste aliqua, præsertim in locis, vbi non habet adhærere alicui, cognoscitur ita, quia res omnis ex tribus principiis est composita: In materia vero Metallorum vnica tantum sine coniunctione, excepta veste, vel eius vmbra scilicet Sulphure, &c.

---

### TRACTATVS IIII.

#### *Quomodo Metalla in terræ visceribus generantur.*

**P**roducuntur Metalla hoc modo, postquam quatuor Elementa virtutes suas proiciunt in terræ centrum, Archæus distillando sublimat calore motus perpetui in terræ superficiē: Est enim terra porosa, & ventus stillando per poros terræ resoluitur in aquam, ex qua res nascuntur omnes: sciant ergo doctrinæ filii sperma Metallorum diuersum non esse à spermate rerum omnium, scilicet vaporem humidum: Ideo frustra quærūt Artistæ Metallorum reductionem in materiā primā, quæ tantum vapor est: Philosophi non talem in-

B 2

telle-



tellexerunt materiam primam, sed tantum materiam secundam, sicuti Bernhardus Treuisanus optime disputat, quamuis non ita lucide, quia de quatuor Elementis loquitur, nilominus id dicere voluit, & solummodo cum filiis locutus est. Ego vero vt clarius Theoricam detegerem, omnes hinc præcauere & monere volui vt tot solutiones, tot circulationes, tot calcinationes ac reiterationes finerent, nam frustra id quæritur in re dura, cum per se mollis vbique sit: Non prima sed secunda tantum quærat Materiam, talis nimirum, quæ simul ac concepta est, in aliam mutari formam non potest. At si quæras, quomodo Metallum in talem reducat Materiam sequor in eo Philosophorum intentionem: Hoc tantum præ cæteris volo, vt filii Artis intelligant sensum Scriptorum, non syllabas, & vbi natura desinat, in Metallicis videlicet coram oculis nostris perfectis corporibus, ibi arti esse incipiendum. Sed vt ad propositum reuertar, (siquidem hic non est intentio nostra de solo lapide) agamus nunc de materia Metallorum: Paulo ante dixi, res omnes nasci ex aere liquido vel vapore, quem Elementa perpetuo motu in viscera terræ stillant, hunc postquam naturæ Archæus accepit, per poros sublimat, & vnicuique loco sua sagacitate tribuit (sicuti in præcedentibus retulimus) & sic locorum varietate res etiam proueniunt, & nascuntur variæ. Sunt qui opinentur, Saturnum habere aliud



aliud semen, aurum quoque aliud: Et sic consequenter Metalla reliqua, sed vana sunt ista: Vnicum tantum est semen, idem in Saturno, quod in auro inuenitur, idem in Luna, quod in Marte, &c. Sed locus terræ diuersus fuit, si me recte intelligis. Quamuis in Luna natura citius, quam in Sole defierit, & sic de aliis: Quando enim ex terræ centro sublimatur vapor ille, transfit per loca vel sicca vel calida: Si igitur transfit vapor per loca calida & pura, vbi pinguedo Sulphuris parietibus adhæret, vapor ille, quem Philosophi Mercurium Philosophorum dixerunt, accommodat se, & iungitur illi pinguedini, quam postea secum sublimat, & tunc fit vinctuositas, relicto nomine vaporis, accipit Nomen Pinguedinis, quæ postea veniens sublimando ad loca alia, quæ iam vapor antecedens purgauit, vbi est terra subtilis, pura & humida, implet poros eius & iungitur illi, & sic fit Sol: Si vero pinguedo illa venit ad loca impura, frigida, fit Saturnus: Si vero talis terra pura sit & mixta Sulphuri, fit venus, &c. Quo enim magis depuratus locus est, eo pulchriora reddit Metalla: Nam sciendum est, quod ille vapor continue egreditur ex centro ad superficiem, eundo purgat loca: inde fit quod hodie reperiantur mineræ in locis, vbi ante mille annos nullæ fuerunt: Nam progressu suo semper subtiliat crudum impurum, parum successiue secum trahens: Et hæc est reiteratio, & circulatio naturæ: tam diu sublimatur,



res novas producendo, donec locus depuratur optime: Et quo magis depuratur, eo etiam nobiliores res producit. Hyeme vero, cum aer frigidus terram constringit, congelatur etiam ille vinctu-  
 ſus vapor, qui poſtea redeunte vere, vna cum terra & Aqua miſcetur, & fit Mangneſia trahens ad ſe ſibi ſimilem Mercurium aeris, qui dat vitam omnibus rebus, per radios Solis, Lunæ & Stellarum, & ſic gramen, flores & ſimilia profert. Natura enim ne momentum temporis oriatur: Metalla vero ſic procreantur, longâ deſtillatione purgatur terra, poſtea acceſſu pinguedinis ea generantur; alio modo non proueniunt, ſicuti quorundam Philoſophorum ſcripta ſiniſtre interpretantium, vana opinio eſt.

---

## TRACTATVS V.

### *De generatione Lapidum omnis generis.*

**L**apidis materia eſt eadem, quæ & aliarum rerum, & ſecundum locorum puritatem hoc modo naſcuntur.

Quando quatuor Elementa ſuum vaporem ſtillant in terræ centrum, & Archæus naturæ eundem eiicit & ſublimat, hic dum tranſit per loca poroſque terræ, trahit ſecum omnem terræ impuritatem uſque in ſuperficiem, quem poſtea congelat aer, nam quod aer creat purus, aer congelat



gelat crudus, quia aer in aerem habet ingressum, & se iungunt inuicem, nam Natura Naturâ læratur, & sic fiunt Petræ & Montes lapidei, secundum magnos & paruos poros: Et quo maiores terræ pori, eo etiam melius purgatur locus: Dum enim per tale respiraculum maior caliditas, & Aquæ maior quantitas transit, eo citius depuratur terra, & sic postea in eiusmodi locis cōmodius metalla nascuntur; sicuti & ipsa testatur experientia, vt Aurum non alibi, nisi in Montibus quæratur & reperiatur, quod in planitie, nisi raro, fieri nequit: Nam sæpissime talia loca humida sunt, non vapore sed Aqua Elementalī, quæ ad se trahit vaporem illum, & ita sese amplectuntur, vt non facile separentur, postea Sol cœli digerens illam, facit argillam pinguem, qua figuli vtuntur: In locis verò vbi est arena grossa, & vapor non habet secum pinguedinem vel Sulphur, herbas & gramen in pratis creat: Sunt & alii lapides preciosi, vt Adamas, Rubinus, Smaragdus, & reliquæ gemæ: Generantur omnes hoc modo: Quando vapor naturæ per se sublimatur, sine accessu pinguedinis, Sulphuris, & venit ad locū Aquæ puræ salis, fiūt Adamātes, & hoc in locis frigidissimis, ad q̄ non pōt peruenire pinguedo illa, q̄ pinguedo nō permetteret ista. Sciendum. n. est, q̄ spiritus Aquæ facillime sublimatur calore facili, sed oleū seu pinguedo nō nisi magno eleuatur calore, & in loca calida: Etiā si. n. ex cētro progredia-



tur, leui congelatur frigore, & sic subsistit: vapor vero ad loca debita ascendit, & congelatur in aqua pura in lapides granulatim. Quomodo vero in gemmis colores fiant, sciendum est, illud ratione Sulphuris in hunc modum fieri: Si Sulphuris pinguedo congelatur motu illo perpetuo, postea Spiritus aquæ transeundo digerit & purificat illud vi salis, donec colore digesto rubeo vel albo coloretur, qui color tendens ad meliora cum illo spiritu quia subtiliatus est, tot reiterationibus destillatis eleuatur cum spiritu, spiritus postea habet potentiam intrandi res imperfectas, & sic introducit colorem, qui postea iungitur illi Aquæ tunc partim congelatæ, & sic implet poros eius, & fixatur cum ea fixatione inseparabili: Congelatur enim omnis Aqua calore, si est sine spiritu, congelatur frigore, si habet spiritus: Sed qui scit congelare Aquam calido & spiritum cum ea iungere, certe rem inueniet millesies preciosiorem auro, & omni re. Efficiat igitur, vt separatur spiritus ab Aqua, vt putrescat, & appareat granum, postea reiectis fæcibus reducat spiritum ex alto in Aquam, & faciat coniungere simul:

illa enim coniunctio, generabit ramentum dissimilem formâ parentibus.

TRA-



## TRACTATUS VI.

*De secunda materia, & putrefactione  
rerum.*

**D**Iximus de prima materia rerum, & quomodo nascuntur res ex natura siue semine, hoc est, quomodo natura ab Elementis accipit materiam, ex qua generat semen: Nunc vero de semine, & rebus generatis ex semine, sermonem instituemus.

Omnis res habens semen, multiplicatur in eo, sed absque naturæ auxilio non fit: Semen enim nihil aliud est, quam aer cōgelatus in aliquo corpore, seu vapor humidus, & nisi hic resoluatur calido etiam vapore, nullius est usus.

Sciant ergo inuestigatores artis, quid semen sit, ne quarant rem, quæ non est, & sciant illud esse triplex, quod ex quatuor Elementis productum est: Primum est Minerale, de quo hoc loco sermo est: alterum vegetabile: tertium Animale: Minerale semē à Philosophis cognoscitur: vegetabile commune ac vulgare est, vt videmus in fructibus: Animale ex imaginatione cognoscitur: vegetabile nobis ostēdit, quomodo natura creat illud ex quatuor Elementis; Sciendum enim est, quod Hyems est putrefactionis causa, siquidem spiritus vitales in Arboribus congelat, & quando hi calore Solis, (inquo est vis Magnetica omnis

B s

hu-



humiditatis attractiua ) resoluuntur, tunc calor naturæ per motum excitatus, pellit ad circumferentiam vaporem aquæ subtilem, qui poros arboris aperit & guttas stillare facit, semper purum ab impuro separando: præcedit tamen interdum purum impurum. Purum dat & congelatur in flores, impurum abit in folia, grossum & spissum, in corticem, arboris cortex manet fixus, folia cadunt frigore vel calore, quando obstruuntur pori eius, flores congelantur in tali calore, qualis est ipsi calor & adfert fructum vel semen: veluti pomum, in quo Sperma est, ex quo non nascitur arbor, sed in illo Spermate est semen vel granum intrinsece, ex quo etiam absque Spermate nascitur arbor: Nam multiplicatio fit non in Spermate, sed in semine: Sic oculariter videmus naturam creare ex quatuor Elementis semen, ne nos in hac frustra occuparemur. Nam quod creatum est, creatore non indiget: Hoc exēpli loco Lectorem admonuisse sufficiat, sed ad propositum minerale redeo. Semen minerale vel metallorum creat natura in visceribus terræ, propterea non creditur, tale semen esse in rerum natura, quia inuisibile est: At nō est mirū q̄ ignari dubitēt, siquidē id, q̄ præ oculis est, nō percipiatur ab illis, multo minus istud, q̄ inuisibiliter absconditū est: Sed verissimū est, q̄ superius non est, nisi vt istud q̄ est inferius & vice versa: id q̄ nascitur supra, nascitur ex eodē fonte, sicuti illud q̄ in-



infra in terræ visceribus: Et quæ prærogatiuâ vegetabilia præ metallis habet, ut Deus illis semine inderet, & hæc immerito excluderet? Nōne eiusdē dignitatis metalla apud Deum cuius & arbores? Hoc pro certo statuatur, nihil sine semine crescere, ubi enim nullum est semen, res est mortua. Necessesse est ergo ut vel quatuor Elementa creent semen, metallorum, vel ea producant sine semine: Si absque semine producuntur, tunc perfecta fieri non possunt, siquidem res omnis sine semine imperfecta est ratione compositi: Qui huic indubitatæ veritati fidem non adhibet, non est dignus, ut naturæ secreta scrutetur, nil enim in orbe nascitur, quod semine destituatur. Semen metallorum vere & realiter ipsis est inditum, Generatio autem eius ita fit. Quatuor elementa in prima operatione naturæ stillant per Archæum naturæ, in terræ centrum vaporem aquæ ponderosum qui est Metallorum semen, & dicitur Mercurius propter eius fluxibilitatem, & vniuscuiusque rei coniunctionem, non propter essentiam; assimilatur Sulphuri, propter internum calorem, & post congelationem est humidum radicale.

Et quamvis corpus metallorum ex Mercurio sit procreatum, quod de Mercurio Philosophorum intelligi debet, tamen hi non sunt audiendi, qui putant Mercurium vulgi semen esse Metallorum, & ita corpus loco seminis accipiunt, non considerantes, quod & dictus  
vulgi



vulgi Mercurius, suum in se habeat semen. Erro-  
res omnium horum, è sequenti patebunt Exem-  
plo. Manifestum est, quod homines habeant  
semen, in quo multiplicantur: Hominis corpus  
Mercurius est, sed semen occultum est in corpo-  
re, & ratione corporis quantitas in pondere exi-  
gua: Qui igitur Hominem generare vult, non  
Mercurius, qui corpus est, sed semen vapor A-  
quæ congelatus accipiat: Sic in regeneratione  
Metallorum sinistre proceditur à vulgaribus  
Chymicis: Corpora Metallica solvunt, siue  
Mercurium, siue Aurum, siue Saturnum, siue  
Lunam, & corrodunt illa aquis fortibus, & aliis  
rebus heterogeneis ad veram artem non requisi-  
tis, postea coniungunt, & simul cogunt, nesci-  
entes, quod ex corpore humano dissecto non  
generatur homo, quia corruptio corporis, & se-  
minis destructio hoc pacto præcessit: Vnaqueque  
res in Mare & fœmina multiplicatur, vt in tracta-  
tu de duplici materia mentionem feci: Diuisio se-  
xus nil creat vel producit, sed debita illius con-  
iunctio profert nouam formam: semina vel Sper-  
mata ergo, non corpora sunt accipienda: & ergò  
Marem viuum, & Fœminam viuum, hos con-  
iunge simul vt inter se imaginentur sperma, ad  
procreandum suæ naturæ fructum. Primam e-  
nim materiam nemo Mortalium credat se facere  
posse: Prima materia hominis terra est, & nemo  
Hominum ex illa Hominem creare potest, solus  
Deus,



Deus hoc scit: at è materia secunda, quæ iam creata est, si in locum debitum posita fuerit, facile natura operante generabitur id, cuius formæ semen est; Artifex hic nil facit, nisi vt sciat subtile à spisso separare, & in vas imponere debitum: Nam hoc considerandum est, pro vt res incipitur, ita finitur: Ex vno fiunt duo, ex duobus vnum & non vltius. Vnus est Deus: ex hoc vno Deo filius est natus: Vnus dedit duo, duo vnum dederunt spiritum sanctum ab vtroque procedentem, sic factus est mundus & sicerit filius eius. Considera priora quatuor puncta exactissime: habes in illis patrem & filium, vltimo S. S. habes quatuor Elementa, habes quatuor luminaria, duo cœlestia, duo centralia, Nil amplius est, fuit, & erit, quam in hac figura pater: si deberem omnia mysteria hinc elicienda consignare, magnum oriretur volumen: redeo ad propositum, & tibi dico verum, fili mi, non creatur ex vno vnum, quia hoc solius DEI est proprium, sufficiat te posse ex duobus creare vnum tibi vtile: Scias ergo Sperma multiplicatiuum esse materiam secundam, & non primam: Prima enim materia rerum non videtur, occulta est in natura vel in Elementis, secunda vero interdum filiis doctrinæ apparet.

TRA-



## TRACTATUS VII.

*De virtute secunda materia.*

**S**ed ut facilius possis comprehendere, qualis sit hæc secunda materia, virtutes ex quibus illam cognosces, describam tibi: ac primum scias, quod natura in tria regna diuisa est: Duo sunt regna, quorum quodlibet per se stare potest, etsi alia duo non essent: Est regnum minerale, vegetabile, & animale. Minerale per se subsistere potest, etsi nullus hominum in mundo esset, nec arbor, vel herba: vegetabile itidem, etiam si nullum metallum nec animal esset, per se stare potest, hæc duo sunt ex vno per vnum creata. Tertium vero ex dictis duobus vitam habet, sine quibus esse non posset, & est nobilius ac præstantius, quam duo prædicta, sicuti etiam postremum est inter illa, & dominatur eis, quia semper in tertio finitur virtus, & in secundo multiplicatur. Viden in vegetabili Regno: prima materia est herba vel arbor, quam tu creare nescis, Natura hoc solummodo facit: In hoc regno secunda Materia est semen, quod tu vides, in hoc multiplicatur Herba vel Arbor. In regno Animali prima materia est bestia seu homo, quem tu creare nescis, & si gloriaris va-

nus



nus es & mendax, natura hoc fecit, & quamvis haberes primam materiam secundum Philosophos, illud sal centrale tamen sine auro multiplicare impossibile tibi foret: semen autem Metallorum, filii tantum doctrinæ nouerunt. In vegetabilibus semina apparent extra, Renes digestionis eius est aer calidus: In animalibus semen apparet intrus & extra, renes digestionis eius sunt Renes viri: Aqua in Mineralibus semen est in centro cordis eorum & vitæ: Renes digestionis eius est ignis.

Vegetabilis seminis receptaculum est terra: Animalis seminis receptaculum est matrix feminæ: Aquæ Mineralis seminis Receptaculum est aer: Et ea sunt seminum receptacula, quæ sunt congelationes corporum: Ea est digestio quæ solutio: Ea putrefactio, quæ destructio. Virtus autem cuiusque seminis est, unicuique rei in suo regno se coniungere, quia subtile est & nihil aliud quam aer, qui pinguedine in aqua congelatur: cognoscitur ita, quia non miscet se extra suum Regnum naturaliter alicui rei, non soluitur sed congelatur, quia solutione non indiget sed congelatione: Necessè est ergo, vt pori corporum aperiantur, vt emittatur sperma in cuius centro semen iacet, quod aer est, illud quando in matricem venit debitam, congelatur & congelat, quod reperit  
pu.



purum vel impurum puro mixtum. Quandiu in corpore semen est, viuit corpus, quando totum consumitur, corpus moritur, omnia autem corpora post emissionem seminis debilitantur: Experientia etiam testatur, homines veneri nimium indulgentes debiliores fieri, vt & arbores nimios fructus ferentes, fieri postea steriles, semen igitur, vt iam multoties repetitum est, res est inuisibilis sed Sperma est visibile, & fere est Anima viuens, non inuenitur in rebus mortuis: Elicitur dupliciter, suauiter & cum violentia sed quia hic de virtute eius saltem sermo est, dico quod nil sine semine nascatur, virtute seminis fiunt omnia, & sciant artis filii in arboribus amputatis frustra semen quæri, quod solummodo in viridibus reperitur.

## TRACTATVS VIII.

*De arte & quomodo per artem operatur  
natura in semine.*

**O**Mne semen per se nullius momenti est, si non ponatur, vel ab arte vel à natura in matricem debitam, & licet semen, per se nobilius sit omni creatura, tamen matrix eius est vita, quæ facit putrescere Sperma vel granum & puri puncti congelationem causatur, insuper calore corporis sui illud nutrit & crescere facit, & hoc fit in  
omni-



omnibus supra dictis tribus naturæ regnis: Et fit naturaliter, per menses; annos & tempora. Sagax vero ars illa est, quæ in regno minerali & vegetabili aliquid abbreuiare potest: sed non in animali: In minerali solummodo perficit hoc, quod natura non potest, propter aerem crudum, qui sua violentia impleuit poros corporis cuiusque, non in visceribus, sed in superficie terræ, ut antea in præcedentibus capitulis dixi: sed ut facilius intelligatur hoc, adhuc adiungere volui, quod Elementa certanter inter se proiiciunt in centrum terræ, quasi in renes semen suum, centrum vero per motum emittit illud in matricem, Matrices vero sunt innumerabiles, quot loca tot matrices, vna purior altera, & sic in infinitum fere. Scias ergo quod pura matrix purum dabit fœtum in suo simili: Exempli gratia, in animalibus sunt matrices hominum, vaccarum, equorum, canum, &c. sic in minerali & vegetabili sunt Metallæ, lapides, salia. Nam salia in hisce duobus regnis sunt consideranda, & loca eorum, secundum magis vel minus.

---

## TRACTATUS IX.

*De commixtione Metallorum, vel de eliciendo semine Metallico.*

**D**Iximus de natura, de arte, de corpore, & de spermate ac semine: iam ad praxin descenda-

C



mus, quomodo videlicet Metalla commisceri debeant, & qualis eorum sit inter se correspondentia: Scias ergo mulierem non discrepare à viro, ex eodem semine, & in vna matrice ambo nascuntur, nihil defuit præter digestionem, & vt matrix purior esset in sanguine & sale: sic luna ex eodem semine cum sole & eadem matrice: sed matrix magis habuit de aqua, quam de sanguine digesto, secundum tempus Lunæ cœlestis. Vt vero eo facilius tibi imaginari possis, quomodo metalla coeant, vt emittant & recipiant semen, intruere cœlum & planetarum sphaeras: Vides quod Saturnus supremus sit, cui succedit Iupiter, huic Mars, postea Sol, quæ sequitur Venus, hanc Mercurius, vltimo loco Luna statuitur: Considera iam quod planetarum virtutes non ascendant, sed descendante. Dedit hoc & ipsa experientia, quod ex Venere non fit Mars, sed ex Marte fit Venus; vtpote vna sphaera inferior, sic etiam Iupiter facile transmutatur in Mercurium, quia Iuppiter secundus à firmamento, & Mercurius secundus à terra, Saturnus primus à cœlo, Luna prima à terra. Sol miscet se omnibus, sed nunquam per inferiores melioratur. Non autem te lateat, magnam esse correspondentiam, inter Saturnum & Lunam, quorum in medio sol constitutus est, sicuti inter Iouem & Mercurium, in quorum medio Sol etiam consistit. Eodem plane modo inter Marrem & Venerem, qui duo

*amor de iun  
dit. non a iun  
dit.*



Nymphae principium est.

nunc tentant  
multi viam  
componendi  
desfallunt hinc  
cursus in TRA-  
interitum.

Sic vivunt  
melius et  
fundatim,

C 2

f x f

Sic salificandus aut  
omnificandus  
sunt boni Eunuchi: aut Probati  
paranymphae Regis  
et Reginae.



*fiat 5 ex 5. aut 5. aut ambob. - fiant p. x.*

*imponere p. p. 0 - - - & p. p. 7. imbib. decies ut in*

## TRACTATUS X.

*miser digere, fermenta, coagula, fige*

## De generatione supra naturali filij solis.

**T**Ractauimus de rebus, quas natura creat, & quas Deus creauit, vt scrutatores artis eo facilius possibilitatem naturæ intelligerent, sed ne diutius differam, modum ac artem conficiendi Lapidis Philosophorum agredior. Lapis Philosophorum seu tinctura, nil aliud est quam aurum in supremum gradum digestum: Nam aurum vulgi est, sicuti herba sine semine, quando maturescit producit semen: sic aurum quando maturescit, dat semen seu tincturam. Sed quæret aliquis, quare aurum vel aliud Metallum non producat semen? ratio redditur talis, quia non potest esse maturum, propter aeris cruditatem, non habet sufficientem calorem & contingit in quibusdam locis, vt reperiatur aurum purum, quod natura voluit perficere, sed impedita fuit ab aere crudo. Exempli gratia, videmus, quod pomorum Arantiorum arbores, hic quidem crescant instar aliarum arborum: in Italia & alibi, vbi est illarum solum natium, dant & ferunt fructus, quia sufficientem habet calorem, in his vero frigidioribus locis minime: Vbi enim maturescere deberent, desinunt, quia frigore opprimuntur: Et sic nunquam à natura in hisce locis habentur earum



earum fructus, licet aliquando iuuetur Natura  
suauiter & cum ingenio, tunc ars iam perficit,  
quod natura non potuisset. Idem plane in metal-  
lis accidit. Aurum potest dare fructum & semen,  
in quo se multiplicat industria sagacis artificis,  
qui scit naturam promouere: sed si absque na-  
tura id velit tentare, errabit: Nam non solum in  
hac arte, sed & in omni re, nihil possumus, quam  
Naturam iuuare, & hoc non alio medio,  
quam igne seu calore: sed cum hoc fieri non pos-  
sit, siquidem in congelato corpore metallico non  
appareant spiritus, oportet vt prius soluatur cor-  
pus, & pori eius apperiantur, quo natura opera-  
ri possit. Qualis autem illa debeat esse solutio, hic  
lectorem admonitum velim, duplicem esse solu-  
tionem, licet multæ sint aliæ solutiones, at inuti-  
les: Vna tantum est vera naturalis: Secunda est  
violenta, sub qua aliæ comprehenduntur omnes.  
Naturalis eiusmodi est vt pori corporis apperiā-  
tur in Aqua nostra, quo digestum emittatur se-  
men, & matrici suæ imponatur. Aqua vero no-  
stra aqua est cœlestis, non madefaciens manus,  
non vulgi, sed fere pluialis. Corpus est aurum  
quod semen dat. Luna nostra est non argentum  
vulgi, quæ recipit semen auri: Regitur postea igne  
nostro continuo, per menses septem, & interdum  
decem, donec aqua nostra consumat tres & re-  
linquat vnum, & hoc in duplo: postea nutritur  
lacte terræ, vel pinguedine eius, quæ nascitur in



vberibus terræ, & regitur vel conseruatur â putrefactione sale naturæ. Et sic generatur ille infans secundæ generationis. Nunc â Theoria ad praxin accedamus.

## TRACTATVS XI.

### *De praxi, & confectione lapidis seu tincturæ per artem.*

**P**ER tot capita sparsa est oratio, de rebus per exempla, vt eo facilius intelligatur praxis, quæ fieri debet naturam imitando in hunc modum.  
 R. Terræ nostræ per XL gradus XL grana, auri nostri & non vulgaris granum I. Lunæ nostræ non vulgaris grana ij, sed hoc admonitus sis, ne accipias aurum & argentum vulgi, nam hæc sunt mortua, accipe nostra quæ sunt viua, postea pone in ignem nostrum, & fiet inde liquor ficcus, primum resoluetur terra in aqua, quæ Mercurius Philosophorum dicitur, & illa aqua resoluit illa corpora Solis & Lunæ, & consumit ea, vt non remaneat nisi pars decima cum vna parte, & hoc erit humidum radicale Metallicum: Postea  
 R. Aquam salis nitri de terra nostra, in qua est riuius & vnda viua, si ad genuam foderis foueã: Accipe igitur ex illa aquam, sed clarâ accipe, huic impone illud humidum radicale, & impone igne putrefactionis & generationis, non tali, vt in  
 prima



prima operatione fecisti, rege omnia magno cum ingenio, donec colores appareant, instar caudæ pauonis, rege digerendo, nec tædeat, donec cessent colores, & vnus per totum appareat color viridis, & sic de cæteris. Et quando videbis in fundo cineres bruni coloris, & aquam fere rubram, aperito vas, madefacito pēnam, inunge fersū aliquod, si tinget, habeto inprōptu aquam, de qua postea erit sermo, & infunde tantum eius aquæ, quantum aeris intrauit crudi, iterum coquito priori igne donec iterum tingit. Huc vsque peruenit mea experientia, nō plus possum, non plus inveni. Aqua vero illa debet esse menstruum mundi ex sphæra Lunæ, toties rectificatum, quod possit calcinare solem. Hic tibi volui omnia deregere, & si sensum meum, interdum non syllabam intelliges, cuncta reuelauī, præsertim in opere primo & secundo. De igne vero adhuc dicendum restat. Primus ignis seu primæ operationis est ignis vnus gradus continuus, qui materiam circumdat: secundus est ignis naturalis, qui materiam degerit & figit: Dico tibi veritatem quod patefeci ignis regimen, si naturam intelligis. De vase adhuc restat loquendū. Vas naturæ esse debet, & sufficiunt duo: primi operis vas rotundum fieri debet: in secundo vero paulo minus vitrum instar Phiolæ vel oui. Sed per omnia scito, naturæ ignem esse vnicum, quicquid operatur diuersum, locorum distantia efficit. Vas item Naturæ vni-



cum, sed nos propter abreuiationem binis utimur: Materia vna, sed ex duabus substantiis. Si igitur animum intendis ad res creandas, considera primum res creatas: has utpote aduersantes oculis tuis, si non potes assequi, multo minus res creandas, quas producere cupis: scito enim te nihil creare posse, quod solius Dei proprium est, sed res occultas in umbra latentes facere apparentes, & umbram ab illis tollere, hoc Philosopho intelligenti à Deo per naturam concessum est. Considera obsecro simplicem nobis aquam: Ecquis nuncquam crederet, illum in se continere omnia quæ mundus habet, lapides duros, salia, aërem, terram, ignem, cum tamen simplex per se appareat Aqua: quid dicam de terra, quæ in se continet aquam, ignem, salia, aërem, & per se nuda terra videtur. O Mirabilem naturam quæ nouit ex aqua in terra fructus producere mirabiles, & ex aere illis suppeditare vitam: Hæc omnia fiunt, & vulgarium hominum oculi ista non vident, sed oculi intellectus & imaginationis percipiunt, visu vero verissimo: Oculi enim sapientum naturam vident aliter, quam oculi communes. Exempli gratia: Oculi vulgi vident Solem esse calidum: Oculi vero Philosophorum è contra vident Solem potius esse frigidum, sed motus eius calidos: Actus enim & effectus eius per distantiam locorum deprehenduntur: Ignis naturæ vnus & idem cum ipso est: sicuti enim sol inter Sphæras planetarum



tarum centrum est, & ex hoc centro cœli deorsum calorem motu suo spargit, sic in centro terræ Sol terræ est, qui motu suo perpetuo calorem vel radios sursum ad terræ superficiem pellit. Is calor intrinsecus, multo efficacior est hoc igne Elementalī, sed temperatur terrena aqua, quæ de die in diem poros terræ penetrat illamque refrigerat: sic Solem cœlestem, & eius calorem temperat aer, qui de die in diem circumuolat orbem: Et nisi hoc esset, calore tali res omnes consumerentur, nec quicquam nasceretur, sicuti autem ignis ille inuisibilis, seu calor centralis omnia consumeret, si non intercederet aqua, sic solis calor omnia destrueret sine intermediente aere, seu d quomodo hæc Elementa inter se agant, breuibus dicam. In centro terræ est Sol centralis, qui motu suo, vel sui firmamenti dat calorem magnum, qui extendit se vsque ad terræ superficiem. Ille calor causatur aerem, hunc in modum: Aeris matrix aqua est, quæ parit filios suæ naturæ, sed dissimiles, & multo subtiliores: Nam ubi Aquæ introitus est denegatus, aer intrat, quando postea ille calor centralis, qui perpetuus est, agit, facit destillare aquam & calefacere, & sic illa aqua vi caloris verritur in aerem, atque hoc pacto, erumpit ad superficiem terræ, quia se includi non patitur: Vbi postea refrixit, resoluitur in aquam in oppositis locis: Interim etiam fit, vt non solum aer, verum etiam Aqua exeat, sicuti apparet, dum

C s      nigræ



nigræ nubes violentia in aerem attolluntur: cuius rei tibi sit hoc exemplum domesticum: facias in olla feruere aquam, videbis igne lento, lentos vapores & ventos, igne vehementiori apparebunt nebulæ crassiores: Eodem plane mod calor operatur centralis, subtilē aquā in aere eleuat, q̄ spissum est ex sale vel pinguedine distribuit terræ, vnde variæ nascuntur: Residuum saxa & petrae fiunt. Posset aliquis obuiere, si ita se res haberet, tunc continuo id fieri deberet, cum tamen sæpe nullus sentiatur vêtus. Respondeo; si nō violentè in vas distillatoriū infunditur aqua, nō fit vêtus, nā parū aquæ, paruum excitat ventum: vides non semper fieri tonitrua, etiam si pluuia sit & ventus, sed tantū quando vi aeris aqua turbida fertur ad sphaerā ignis, nā ignis nō patitur aquā: Habes ante oculos exemplum. Dum in calidam fornacē effundis aquam frigidā, vnde tonitrua excitantur, sed quare non vniformiter, aqua intret in illa loca, & cauitates, ratio est, quod multa sunt eiusmodi vasa, & loca, pellit interdum vna concavitas ventos, aquam, a se ad aliquot dies & mēses, donec iterum fiat aquæ percussio, vt videmus in mari, cuius fluctus aliquando multa millaria agitantur, antequam percussione, vt regrediantur, offendant. Sed ad rem nostram. Dico ignem vel calorē esse causam motus aeris, & vitam omnium rerum, & terra est horū omniū nutritrix, vel receptaculū sed si non esset aqua, quæ refrigerat terrā & aerē nostrum,



strum, tunc terra exiccaretur, propter has duas rationes nimirum ob motus centralis & solis cœlestis calorem: nihilominus contingit hoc in aliquibus locis, quando pori terræ obstruuntur, ut humidum penetrare non possit, tunc per correspondentiam solis cœlestis & centralis, quia vim habent inter se magneticam, accenditur terra à sole, sicque etiam aliquando cades grauis orbita mundi. Fac igitur, ut operatio talis in terra nostra sit, ut calor centralis aquam possit mutare in aerem, ut in planitiem mundi egrediatur, & residuū ut dixi, per poros terræ spargat, & nunc in opposito aer vertetur in aquam multo subtiliorem quam fuit prima, & hoc sic fiet, si seni nostro aurum, & argentum deglutire dabis, ut ipse consumat illa, & tandem ille etiam moriturus comburatur, & cineres eius spargantur in aquam, coquiro ea donec satis est, & habes medicinam curandi Leporam. Hoc saltem animaduerte, ne frigidum pro calido, vel calidum pro frigido accipias, Naturas Naturis misce, si aliquid est, quod contrarium naturæ (siquidem vna tibi est necessaria) separa illud, ut Natura Naturæ similis sit, hoc fac igne non manu, & scito, si non sequeris Naturam, vana esse omnia, & hic tibi dixi per sanctum Deum quod pater filio debet. Qui habet aures audiat, & qui habet sensus animum aduertat.

TRA



## TRACTATUS XII.

*De lapide & eius virtute.*

**I**N præcedentibus sufficienter dictum fuit de productione rerum naturalium, de Elementis, & de materia prima, & materia secunda, de corporibus, & seminibus, de usu & virtute eorum: Conscripsi etiam praxin conficiendi lapidem Philosophorum: de eius vero virtute tantum, quantum mihi natura concessit, & experientia patefecit, nunc reuelabo. Sed ut prius adhuc summam & breuibus verbis comprehendam omnium horum tractatum Argumentum, ut Deum timens Lector, mentem meam assequatur, & sensum meum, ita se res habet.

De veritate artis, si quis dubitat, legat copiosa Philosophorum antiquissimorum ratione & experientia verificata scripta, quibus ut fide dignis, in sua arte, fides non deroganda est: Qui vero illis fidem non adhibet, tunc contra principia negantem non esse disputandum nouimus: Surdi enim & muti loqui non possunt. Dixi artem esse veram, quam enim prærogatiuam in hoc mundo res omnes haberent præ metallis? cur hæc sola per denegationem seminis immerito à summi creatoris vniuersali multiplicationis benedictione excludemus, quam sacrae literæ affirmant, omnibus rebus creatis statim à condito mundo indi-



inditam & impertitam fuisse. Si vero semen habent, quistam fatuus est, qui non credat in suo semine illa posse multiplicari? In natura sua ars Chymiae vera est, vera etiam natura, sed raro verus Artifex: vna natura, ars vna, sed multi artifices. Quod autem natura creat res ex Elementis, generat eas per velle Dei ex materia prima, quam solus Deus scit: Natura creat res illasque multiplicat ex secunda materia, quam Philosophi sciunt. Nil fit in mundo sine velle Dei & naturæ. Elementum enim quodlibet in sua Sphæra est, sed vnum absque altero esse non potest, vnum ex alio viuit, & tamen coniuncta non conueniunt: sed aqua est omnium Elementorum dignior, quia mater est omnium rerum. Hanc supernatat spiritus ignis, causante igne aqua fit materia prima, certatione videlicet ignis cum aqua, & sic generantur venti vel vapores apti, vt congelentur cum terra per aerem crudum, qui ab initio separatus fuit ab illo, & hoc fit sine cessatione motu perpetuo, quia ignis seu calor nō excitatur aliter nisi motu, quod facile videre est apud fabrum ferrarium, ferrum lima comminentem, quod eatenus mora vehementiori incalescit, ac si igne incanduisset: Motus ergo causat calorem, calor mouet aquam, aquæ motus causat aerem omnium viuentium vitam. Crescunt igitur res hunc in modum, vt supra dixi, ex aqua videlicet, nam ex illius vapore subtiliori, res subtiles, leues pro-  
ueniunt:



veniunt. Et oleo vero eiusdem graues & maioris pretii: Ex sale autem res prioribus longe pulchrioribus. Quia autem natura interdum impeditur, ne res duras producere possit, siquidem vapor, pinguedo, sal maculantur, & miscent se terræ locis, propterea docuit nos experientia purum ab impuro separare: Ideo si velis ut natura melioretur in actu, solue corpus quoduis, & illud quod naturæ accessit, Heterrogeneum, separa, purga, coniunge pura puris, cocta coctis, cruda crudis, secundum naturæ pondus non materiæ: Nam scito quod sal nitri centrale non accipit plus de terra, nisi quantum opus habet, siue sit pura siue impura. Aquæ vero pinguedo aliter se habet, nam nunquam habetur pura, ars purgat illam, per duplicem calorem, & denuo coniungit illum.

*EPILOGVS SEV CONCLVSIO  
horum duodecim Tractatuum.*

**C**Onscripsi amice lector, præcedentes duodecim Tractatus in gratiam filiorum artis, ut antequam manum adhiberent operi, Naturæ operationem haberent cognitam, quomodo videlicet illa operando res producat, ne sine clauibus portam ingrederentur, & cribro aquam haurirēt. Frustra enim laborat ille, qui sine cognitione naturæ manus ad labores porrigit, & in hac sancta  
&



& verissima scientia in nocturnis versatur tenebris, cui Sol non lucet, in densa umbra est, cui de nocte non apparet luna. Habet natura lumen proprium, quod nostris oculis non est peruium; umbra Naturæ nostris oculis corpus est, sed si quem lumen naturæ irradiat, illi confestim nebula de oculis tollitur, & sine impedimento potest conspiciere punctum Magnetis nostri correspondentis utriq; centro radiorum, solis videlicet & terræ: Eo usque enim Naturæ lumen penetrat, & interna patefacit: cuius rei tale tibi sit exemplum. Induatur veste vniiformi adolescens duodecim annorum, & puella eiusdem ætatis, si iuxta se locentur, nemo cognoscet, quis masculus, quæ fœmella sit. Oculi enim nostri penetrare non possunt, ideo decipit nos noster visus & falsa pro veris accipit: Sed cum vestibus sublati denudantur, ut ita appareant, quales Natura eos formauit, facile uterque in suo dignoscitur sexu: Simili plane modo noster intellectus facit umbræ Naturæ umbram: Nam corpus nudum in homine est seminis Naturæ umbra: Sicuti igitur vestimentis tegitur corpus humanum, sic etiam tegitur corpore natura humana, quam sibi Deus reservauit tegendam & detegendam. Possem hic prolixè & philosophice disserere de hominis dignitate, creatione eius & generatione, sed cum eiusmodi non sint huius loci, silentio prætereunda sunt: De vita eius solummodo paucis agam. Creatus homo de  
terra,



terra, ex aere viuit; Est enim in aere occultus vitæ,  
 cibus, quem nos rorem de nocte, de die aquam  
 vocamus rarefactam, cuius spiritus inuisibilis,  
 congelatus melior est, quam terra vniuersa. O  
 Sancta & admirabilis natura, quæ filios doctrinæ  
 errare non permittis, sicuti in vita humana indies  
 demonstras. Porro in hisce duodecim Tractati-  
 bus tot rationes naturales in medium attuli, vt eo  
 facilius cupiens, & Deum timens Lector, intel-  
 ligere possit ea omnia, quæ oculis meis Deo be-  
 nedicente vidi, manibus feci propriis sine vlla so-  
 phisticationis fraude: sine lumine enim & cogni-  
 tione Naturæ impossibile est, hanc assequi ar-  
 tem, nisi singulari reuelatione diuina alicui con-  
 tingat, vel per secretam amici demonstrationem.  
 Res est vilis & præciosissima, quam aliquoties  
 descriptam nunc denuo repeto & aeris partes X.  
 Auri viui vel lunæ viuæ partem I. Hæc omnia im-  
 pone vasi tuo, coque aerem hunc imprimis vt sit  
 aqua, & postea non aqua: Si hoc ignoras, & ae-  
 rem coquere nescis, sine omni dubio errabis, si-  
 quidem hæc est veterum Philosophorum mate-  
 ria: id enim accipere debes, quod est, sed non  
 videtur, donec artifici placeat: Est aqua roris no-  
 stri, ex qua extrahitur sal petreæ Philosophorum,  
 quo omnes res crescunt & nutriuntur: Matrix eius  
 est centrum Solis vel lunæ tam cœlestis quam ter-  
 restris: Et vt apertius dicam, Magnes est noster,  
 quem in præcedentibus Chalyben esse dixi: Aer  
 gene-



generat Magnetem; Magnes vero generat vel facit apparere aerem nostrum: Sancte tibi veritatem hic manifestavi, roga Deum, ut cœpta tua secundet. Et sic hoc loco habebis verissimam explicationem Hermetis asseuerantis, patrem eius esse solem, matrem vero Lunam. Et quod ventus portauerit illum in ventre suo: nimirum sal Alkali, quod Philosophi sal Armuniacum & vegetabile nominarunt occultatum in ventre Magnesiae. Operatio eius talis est, ut soluas congelatum aerem, in quo solues auri decimam partem, hoc sigilla & igne nostro labora, donec aer vertatur in pulueres, & apparebunt, habito mundi sale, colores varii. Descripsissem integrum processum in hisce tractatibus sed quia ille vna cum multiplicatione, in Lullii & aliorum verorum Philosophorum libris sufficienter continetur, propterea satis mihi fuit, tantum de Materia prima & secunda tractare, quod candide factum est, nec arbitreris vllum mortalium me luculentibus illud præstitisse, siquidem id non è mutis libris, sed ex mearum manuum labore & propria experientia feci. Si igitur vel non intelligis, vel non credis veritati, noli meum librum, sed teipsum accusare, & crede Deum tibi hoc secretum nolle reuelare. Hunc igitur precibus fatiga, & multoties reiteratis lectionibus hunc libellum euolue, præsertim horum tractatum Epilogum: considerando semper naturæ possibilitatem, & Elementorum a-

D ctiones



ctiones, & quodnam sit in illis præcipuum & præsertim in rarefactione aquæ vel æëris: Ita enim creati sunt cœli, totusque mundus, hoc tibi; sicut pater filium, significare volui; ne mireris quod tot tractatus scripserim, non mea causa factum est, cum libris nō egeam, sed ut multos, qui in vanis rebus laborāt, monerem, ne frustra sumptus exponerent: potuissent quidē omnia paucissimis comprehendere lineis, imo verbis: Sed per rationes & exempla volui te ad Naturæ cognitionē deducere, ut antea omnia scires, quid querere deberes, an primam vel secundam materiā. Haberes etiam patefactam naturam, eiusque lumen & vimbram: Noli moueri, quod aliquādo contradictoria in meis tractatibus, more Philosophorum vsitato, tibi occurrāt: opus habes illis, si intelligis: Non reperitur rosa sine spinis. Perpende diligenter, quod supra dixi, quomodo videlicet quatuor elementa stillent in cœtrum terræ humidum radicale, & quomodo Sol terrenus centralis motu suo producat, & sublimet illud ad terræ superficiem: Dixi etiam solem cœlestem habere correspondētiā cum Sole centrali: Nam Sol cœlestis & Luna peculiarem habent vim & virtutem stillandi per radios suos in terrā, calor enim calori, sal salī facile iungitur: Et sicut Sol centralis habet suum mare, & aquam crudam perceptibilem, sic Sol cœlestis habet etiam suum mare, & aquam subtilem & imperceptibilem: In superficie terræ, radii  
radiis



radiis iunguntur, & producant flores, & omnia: Propterea quando pluuia fit, accipit ex aere illam vim vitæ, & coniungit illam cum sale nitro terræ, (quia sal nitri terræ est instar calcinati tartari, siccitate aerem ad se trahens, qui aer in eo resoluitur in aquam: Talem vim attrahendi habet ille sal nitri terræ, qui etiam aer fuit, & est coniunctus pinguedini terræ) & quo radii solares copiosius tunc feriunt, eo maior salis nitri quantitas fit, & per consequens maior frumenti copia crescit, & hoc de die in diem fit.

Tantum de correspondentia rerum inter se & efficacia Solis & Lunæ, & Stellarum innuere volui ignorantibus, nam scientes non indigent hac instructione. Versatur subiectum nostrum toti mundo ob oculos, & non cognoscitur. O cælum nostrum: O aqua nostra. O Mercurius noster: O sal nitri nostrum in mari mundi versans: O vegetabile nostrum: O Sulphur nostrum fixum & volatile: O caput mortuum, seu fæces maris nostri: Aqua manus nō mædefaciens, sine qua nemo mortalium viuere potest, & sine qua nil nascitur: & generatur in toto orbe. Et hæc sunt Auiculæ Hermetis Epitheta, quæ nunquam quiescit, vilissima est, nemo ea carere potest: Et sic habes rem omni mundo preciosiorem, detectam, quam plane dico nil aliud esse quam aquam nostram ponticam, quæ in Sole & Luna



congelatur, & extrahitur è Sole & luna calybe nostro, artificio philosophico miris modis, per prudentem artis filium. Consilium meum non erat, proter rationes in præfatione commemoratas hunc librum publicare, attamen vicit me de liberalibus & philosophicis ingeniis promerendi cupiditas, ut iis qui me norunt, animum ostenderem bonum, simul illis, qui artem callent, manifestarem, me illis parem esse, & socium, eorumque notitiam appetere. Non dubito, multos bonæ conscientiae & voluntatis homines, illud donum Dei clanculum possidere; Hi meo admoniti exemplo & meis periculis cautiores & providentiores facti, Harpocratis sibi commendatum habeant silentium, quotiescunque enim me magnatibus detegere volui, semper aut in damnum aut periculum mihi cessit. Hoc scripto, me adeptis filiis Hermetis patefacio, & ignorantes errantes instruo, ac in viam veram reduco.

Credant scientiae hæredes, se nunquam habituros meliorem viam, cui insistant, quam quæ ipsis hic demonstrata est, omnia enim aperte dixi. Extractionem saltem nostri salis Armoniaci vel Mercurii philosophici, ex aqua nostra pontica, eiusque tantum usum non ita aperte reuelavi, quia à magistro naturæ non habui ulteriores loquendi licentiam: Et hoc solus Deus reuelare debet, qui nouit hominum corda & animos: quæ si diligenter oraueris, per reiteratam huius libri  
lectio-



lectionem, poterit tibi intellectum tuum aperire. Vas vt supra dictum vnicum est, à principio vsque ad finem, vel ad summum duo sufficiunt vasa: ignis etiam continuus in vtroque opere, quo nomine legant errantes tractatum X. & XI. Si in tertia materia operatus fueris, nil efficies: Hanc tractant hi, qui extra hoc vnicum sal nostrum, quod Mercurius est, laborant in herbis, animalibus, lapidibus, & mineris, excepto Sole & Luna nostra, quæ obducta est sphaera Saturni. Et qui optatum desiderat finem, sciat conuersionem Elementorum, & leuia facere ponderosa, & spiritus facere non spiritus, tunc non laborabit in re extranea; ignis est Regimen: Quicquid fit, igne fit, vt sufficienter in præcedentibus; & hic conclusionis loco satis dictum est.

Vale lector beneuole, & hisce per experientiam meam, verificatis laboribus diu ad Nominis Diuini gloriam, animæ tuæ salutem, proximique commodum perfruere,

*EIVSDEM AVTHORIS AD FILIOS veritatis; Aenigma Philosophicum.*

**I**Am vobis filii scientiæ, è scaturigine vniuersalis fontis detexi omnia, vt nil sit amplius residuum. Nam in præcedentibus meis tractatibus, naturam per exempla sufficienter explicui: Theori-

D 3

cam



cam & praxin, quantum fas fuit manifestavi. Sed ne quis de Laconismo conqueri possit, quod aliquid omiserim, totam artem ænigmatice adhuc vobis describam, ut videatis, quousque Dei ductu pervenerim. Infiniti sunt libri, de hac arte tractantes, vix in ullo reperietis veritatem eatenus vobis patefactam, quod hanc ob causam præstare volui, quia cum multis, Philosophorum scripta se bene intelligere putantibus, sermonem contuli, sed deprehendi illos eadem scripta longe subtilius explicare, quam Natura, quæ simplex est, requirebat: Imo omnia mea dicta veridica, ipsis semper alta sapientibus videbantur nimium vilia, & incredibilia: Aliquoties accidit, ut quibusdam de verbo ad verbum artem insinuarem, sed nequaquam assequi potuerunt, non credentes Aquam in Mari nostro esse, & tamen Philosophi videri volebant: Cum ergo verba mea oretenus dicta non potuerunt intelligere, non timeo (uti alii Philosophi timuerunt) ut quis tam facile concipere possit, Donum est Dei dico. Verum quidem est, si in studio Chymico requireretur subtilis ingenii perspicacitas, & res eiusmodi esset, ut ab oculis vulgi posset conspici, satis apta vidi illorum ingenia ad indaganda talia: Sed vobis dico, ut sitis simplices, & non nimium prudentes, donec Arcanum inueneritis, quo habito necessario aderit prudentia, tunc vobis non deerit libros infinitos



vos scribendi facultas, quod longe facilius erit illi, qui in centro est, & rem videt, quam huic, qui in circumferentia ambulat, & nil præter auditum habet: omnium rerum Materiam secundam lucidissime descriptam habetis, sed hanc vobis commendo cautelam, quod si ad arcanum hoc peruenire volueritis, scitote, quod in primis Deus orandus, postea proximus amandus sit: Denique nolite vobis res adeo subtiles imaginari, de quibus Natura nil scit, sed manete, manete, inquam, in via Naturæ simplici, quia in simplicitate rem citius palpare, quam eandem in subtilitate videre poteritis: Nolite in lectione meorum scriptorum semper inhærere syllabis, sed legendo utique considerate Naturam, & eiusdem possibilitatem. Antequam vero ad opus vos accingatis, imaginamini diligenter quid quæritis, & quis sit intentionis vestræ scopus ac finis: Nam multo melius est cerebro & imaginatione prius discedere, quam re, quam manu & sumptibus. Et hoc vobis dico, quod opus est rem quæ-  
re aliquam, quæ occulta est, ex qua fit (miro  
modo.) talis humiditas quæ aurum sine vio-  
lencia seu strepitu soluit: Imo ita suauiter & na-  
turaliter, sicuti glacies aquæ calidæ bene-  
ficio liquefcit: Si hoc inuenistis, habetis  
rem, ex qua aurum à Natura productum  
est: Et quamuis omnia Metalla & res omnes



56 *Epilogus duodecim Tractatum,*

ex illa ortum habeant, nil tamen ita amicitur ei,  
sicut aurum, nam aliis rebus adhæret impuritas,  
auro autem nulla, propterea instar matris est ipsi.  
Et sic finaliter concludo, si hisce meis scriptis &  
admonitionibus cauti esse non vultis, habetote  
me, bene de vobis mereri cupientem, excusatum,  
feci fideliter quantum licuit, sicuti bonæ con-  
scientiæ virum decet: Si quæritis quis sim, cos-  
mopolita sum: Si me nostis, & boni ac honesti  
viri esse desideratis, tacebitis: Si me non nostis,  
nolite de me inquirere, nulli mortalium enim,  
quandiu vixero, plus à me reuelabitur, quam hoc  
publico scripto factum est. Credite mihi, si non  
essem eiusmodi status ac conditionis homo, sicut  
sum, nil mihi solitaria vita foret iucundius, vel  
cum Diogene sub dolio delitescere. Video enim  
omnia quæ sunt, vanitatem esse, fraudem & aua-  
ritiâ inualuisse, vbi omnia venalia sunt, & iniqui-  
tatem virtutem superasse. Futuræ vitæ meliora  
præ oculis video, hisce gaudeo: Iam non miror  
vt antea feci, cur Philosophi habita tali medicina  
non curarunt abbreviare dies suos, quia omni  
Philosopho ita est præ oculis vita sequens, sicuti  
in speculo apparet tibi tua propria facies: quod si  
tibi Deus dabit optatum finem, postea cre-  
des mihi, nec te mundo reue-  
labis.

SEQUI-



*SEQUITVR PARABOLA SEV**Aenigma Philosophorum, coronidis &  
superadditamenti loco adiunctum.*

**E**Venit aliquando cum per tot annos vite mee nauigare à polo Arctico ad polum Antarcticum, vt singulari Dei nutu eicerer ad littus magni cuiusdam maris: Et licet maris illius mundi aditus & proprietates optime cognitae & perspectas haberem, nilominus inscius fui, an etiam in illis oris generaretur pisciculus, ille Echeneis, quem tot magnae & paruae conditionis homines haecenus tam sollicitè quæsierunt: Dum autem in littore Melosynas hinc inde natantes cum Nymphis conspicio, fessus etiam à præcedentibus laboribus, & cogitationibus variis grauat, ab aquarum murmure somno corripior: Et dum suauius obdormisco, occurrit mihi in somnis visio mirabilis. Video è mari nostro venerandæ canitiei senem NEPTVNVN cū tridente egredientem, qui me post amicam salutationem in Insulam deducit amenissimam. Hæc Insula pulcherri- ma versus austrum sita erat, ac rebus omnibus, ad hominis necessitatem, & ad eiusdem delicias spectantes, refertissima.

Virgilii campus Elysius vix cum illa potuisset comparari. Totum Insulae littus, vndique virentibus myrtis, cupressis, ac Roremarino cinctum erat. Prata virentia varietatis floribus tecta, iu-

D 5

cun-



cundissime aspectu, suauissime redolebant. Colles vineis, oleis, & cedris, miro modo decorati erant. Nemora Arantiorum & Limoneorum arboribus referta: Viæ publicæ laurorum ac Granatorum arboribus singulari artificio intertextis, vtrique consitæ, gratissimam peregrinantibus præbebant vinbram. Vt paucis dicam, quicquid in toto mundo est, ibidem videbatur: Inter ambulandum monstrabantur mihi à dicto Neptuno sub aliqua rupe, latentes duæ illius Insulæ minere Auri & Chalybis. Non longe illinc deducor ad pratum in quo peculiaris hortus variis & spectatu dignissimis arboribus plantatus erat; Inter complures Arbores autem, ostendit mihi septem arbores nominibus insignitas, ac inter has duas præcipuas, aliis eminentiores observavi, quarum vna ferebat fructum instar solis lucidissimi & fulgentissimi, & folia eius erant instar Auri; Altera vero producebat albissimos Liliis candidiores fructus, & folia eius erant sicuti Argentum vivum: Vocabantur autem hæ arbores à Neptuno vna solaris arbor, & altera Lunaris. Et quamvis in hac Insula omnia ad nutum essent, vnicum tamen ipsi deerat. Aqua non habebatur, nisi magna cum difficultate, erant quidem multi, qui partim tentabant illuc Aquam fontis per canales deducere, partim etiam ex variis rebus eliciebant, sed frustraneus erat attentatus labor, quia illic locorum nullo

po-



poterat haberi medio : & si habebatur , inutilis tamen fuit & venenosa : nisi è radiis Solis vel ☽. quod pauci præstare potuerunt , & qui in hoc perficiendo fortunam habuit propitiam , nunquam ultra decem partes potuit attrahere. Erat enim eiusmodi Aqua mirabilis , & crede mihi , quod oculis meis viderim , & palparim Aquæ illius niveum candorem , & dum illam aquam contemplerer , valde miratus sum : Interim fatigatus illa consideratione , evanuit coram oculis meis Neptunus , & appareret mihi vir magnus , cuius fronti nomen Saturni erat insculptum : Hic accepto vase hauriebat Aquæ partes decem , & statim de fructu Arboris Solaris accepit & imposuit , & vidi fructum Arboris consumi & resolui instar glaciæ in Aqua calida : quæsiui ex illo ? Domine , video rem mirabilem Aquam esse fere ex nihilo , video fructus Arboris in illa , adeo suavi calore consumi , quid ista ? At ille mihi gratiose respondit : Fili mi , verum est quod res hæc est mirabilis , sed ne mireris , ita enim oportet esse : Nam hæc aqua est *æ* aqua vitæ , habens potentiam fructus arboris huius ita meliorare , ut postea non plantatione seu insitione , sed solo suo odore faciat sibi ceteras sex Arbores uniformes. Insuper hæc aqua est huic fructui instar fœminæ , in re nulla possunt arboris huius fructus putrescere nisi in hac aqua : Et licet fructus per se sit mirabilis



bilis, & res preciosa, attamen si in hac aqua putrescit, gignit ex hac putrefactione Salamandram in igne perseverantem, cuius sanguis omni thesauro preciosior est, habens facultatem sex arbores, quas hic vides, fertiles reddere, illarumque fructus melle dulciores proferre. At ego petii, Domine, quomodo fit istud? Dixi tibi, inquit, arboris solaris fructus esse viuos, dulces, at ubi nunc vnus saltem ex illo saturatur, quando in hac aqua coquitur, possunt postea mille, ex eo saturari. Quæsiui porro, Domine: coquitur ne igne forti, & quandiu? At ille? aqua ista habet intrinsicum ignem, & si iuuatur calore continuo, comburit tres partes corporis sui cum hoc corpore fructus, & non remanebit, nisi pars minutissima, quæ vix imaginari potest, sed in summa virtute, coquitur sagaci ingenio Magistri septem mensibus primo, postea decem: sed interea apparent res variæ, & semper in die quinquagesimo plus vel minus. Adhuc interrogaui: Domine? nonne potest etiam, in aliis aquis coqui hic fructus, vel additur ne illi aliquid? Respondit: non est nisi hæc vna aqua, quæ utilis est in hac regione vel in Insula: Nulla etiam alia aqua potest penetrare poros huius pomi nisi hæc, & scito arborem solarem etiam ex hac aqua ortam, quæ ex radiis solis vel Lunæ vi magnetis extracta est. Propterea inter se magnam habent concordantiam: Sed si aliquid peregrini ipsi addererur, non posset id præstare, quod



Quod facit per se: Relinquenda igitur per se, nihilque ei addatur, nisi hoc pomum: Post decoctionem enim est fructus immortalis, vitam habens & sanguinem, quia sanguis omnes arbores steriles facit portare fructus eiusdem naturæ cum pomo. Rogavi ulterius: Domine? hauriturne ~~Aqua~~ hæc alio modo, vel habeturne ubique? & ille, in omni loco est, & nemo sine ea vivere potest, hauritur miris modis, sed ista est optima, quæ ~~extrahitur vi chalybis nostri~~, qui inuenitur in ventre Arietis. Dixi? ad quid utilis? Respondit, ante debitam coctionem est summum venenū, sed post coctionem conuenientem summa est medicina, & dat viginti nouem grana sanguinis, quodlibet autem granum, octingentos sexaginta quatuor suppeditabit tibi fructus arboris solaris. Quæsiui? nonne ulterius meliorari potest, teste scriptura philosophica, ait, ad decem, postea ad centum, deinde ad mille, & decem millia, &c. potest exaltari. Instabam, Domine mi, noveruntne multi istam aquam, & habet ne nomen proprium? Ille clamabat palam dicens, pauci nouerunt, sed omnes viderunt, & vident & amant: Habet nomina sed multa & varia? At nomen proprium eius est ~~Aqua maris nostri~~, Aqua vitæ, non mafaciens manus. Petii adhuc: vtuntur ne ea alii ad res alias? Vtitur ea, ait, omnis creatura, sed inuisibiliter. Nascitur ne in ea aliquid, interrogavi: At ille? ex ea fiunt res omnes in mundo, & in ea uiuunt,



uunt, sed in ea proprie nihil est, sed est res quæ se  
 miscet omni rei. Quæsiui: estne sine hoc arboris  
 fructu utilis? ad hoc dixit: in hoc opere nequaquā,  
 siquidē nisi in sole hoc arboris solaris fructu me-  
 lioratur. Incepi adhuc rogare, Domine: quæso  
 nomina mihi illā tam manifesto nomine, ut nul-  
 lum possim amplius habere dubium: At ille sub-  
 lata voce ita clamauit, ut me ē somno excitaret, i-  
 deo non amplius poteram quærere, nec ille ulte-  
 rius mihi respondere voluit, nec ego tibi plura di-  
 cere possum, contentus esto hisce, & crede quod  
 non est possibile, ludicius loqui: Nam si hæc non  
 percipis, nunquam aliorum Philosophorū libros  
 assequeris. Post Saturni insperatum ac subitaneū  
 discessum, nouus me sopor inuasit, & denuo mihi  
 forma visibili apparet Neptunus: Præsentem in  
 hortis Hesperidum, congratulatur felicitatem  
 monstrando mihi speculum, in quo totam natu-  
 ram detectam vidi: Post varios vltro citroq; com-  
 mutatos sermones, gratias ipsi pro exhibitis be-  
 neficiis ago, quod suo videlicet ductu, non solum  
 hunc amœnissimum Hortum ingressus fuerim,  
 verum etiam in optatissimum Saturni colloquiū  
 venerim: Sed quia propter improuisum Saturni  
 discessum difficultates aliquæ quærendæ & inue-  
 stigandæ adhuc restarent, rogavi enixe, ut hac ex-  
 optata occasione mihi scrupulum eximeret. His  
 autem verbis illum cōpello, Domine, legi libros  
 Philosophorum affirmantium generationem om-  
 nem



innem fieri per Marem & fœminam, & tamen solum fructum arboris solaris vidi in somniis, Saturnum Mercurio nostro imponere, credo etiam tibi vt Domino Maris huius, quod ista bene scias, responde quæstioni meæ quæso? At ille, verū est, fili, omnis generatio fit in mare & fœmina, sed propter distinctionem trium Naturæ regnorum, alio modo nascitur animal quadrupes, alio modo vermis. Licet. n. vermes habeant oculos, visum, auditum, & reliquos sensus, tamen per putrefactionē producuntur, & eorū locus vel terra, in qua putrefiunt, fœmina est: Ita in corpore philosophico mater est huius rei, repetita toties illa aqua tua, & quicquid ex ea nascitur, more vermium, per putrefactionē nascitur: Ideo Philosophi phœnicem & Salamandram vocarunt: Si enim ē duorū corporum cōceptione fieret, esset res morti obnoxia, at quia se tantū reuificat, destructo corpore priori, emicat aliud incorruptibile: Siquidem mors rerū nihil aliud est, quam separatio vnus ab altero: Et in hac phœnice ita fit, quod se vita à corpore corruptibili per se separat: Insuper quæsiui? Domine mi, suntne diuersæ res rerum vel cōceptio in hoc opere? At ille, vnica res est, cui non miscetur aliquid aliud præterquam aqua philosophica, tibi in somno aliquoties manifestata, quæ in decuplo esse debet ad vnā corporis partem: Et firmiter ac indubitate credas, fili, quæ per somnia in hac Insula pro more regionis, tibi à me



64 *Authoris Aenigma Philosophicum*

me & à Saturno fuerunt patefacta , nullo modo  
esse somnia, sed purissimam veritatem, quam ex-  
perientia vnica rerum Magistra tibi Dei assisten-  
tia detegere poterit. Vltius quærentem sine re-  
sponso post valedictionem discedens, me à som-  
no excitatum, in desideratam Eutopiæ regionem  
sistit. Et ita tibi etiam amice Lector, satis  
hactenus à me dictum suffi-  
ciat. Vale.

F I N I S.





vicum  
nullo modo  
m, quam ex  
Dei afflicto-  
nem sine re-  
gime a lom-  
regionem  
tor, las  
ti-







